

# **Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

**Vom Abendmal des Herrn, Etliche Sprüche der alten Veter**

**Melanchthon, Philipp**

**Wittemberg, 1532**

[Text]

**urn:nbn:de:bsz:31-61906**

ak

77 A 9129 RH

Dem durchleuchtigen Hochgebornen Fürsten vnd herren/ herren Albrechten Marggrauen zu Brandenburg/ inn Preussen/ zu Stettin/ Pomern/ der Cassuben vnd Wenden Hertzog/ Burggraffen zu Nurnberg vnd Fürsten zu Neugen/ meinem gnedigen herrn/ wünsch vnd entbiete ich Michael Meurer von Denichen/ Prediger im Lebenigt zu Kängsperg inn Preussen/ Gnad vnd fried inn Christo vnserm Derrn/ mit gantz williger vnter/ thenigkeit.



Durchleuchter Hochgeborner Fürst gnediger herr/ Sintemal vns vberschüt hat/ vnser barmhertziger ewiger Gott vnd vater/ reichlich mit seinen gnaden/ inn diesen letzten zeitten/ vnd vns gnediglich gefürt vnd bracht zu seinem erkentnis/ durch seinen lieben Son vnserm Derrn Ihesum Christum/ vnd teglich noch gibt seinen heiligen geist/ welchen Christus vnser lieber Derr vns erworben hat/ durch welchen vnser gemüt vnd hertz allein from vnd gerecht/ vnterweist vnd gelernet werden vnd bestetiget im guten/ welcher auch vnser





fer armen gewissen noch teglich tröstet / füret  
vnd leitet / Vnd solchs alles wircket er inn  
vns / nicht one mittel / sondern gebraucht da  
zu das eusserliche / mündliche / warhafftig /  
Göttlich wort / durch die eusserlichen predigte  
des heiligen Euangelij.

Wiewol vns nu der barmhertzige ewige  
vater / also reichlich vberschüt / mit den reich  
thümern seiner gütigkeit / so wird doch solchs  
von vielen nicht erkant / noch geglaubet / auch  
nicht gehalten fur sein heiliges wort / sondern  
mehr fur ein menschen wort / vnd todten buch  
staben. Solche hohe geister / aus wollust vnd  
eigenem gefallen ihrer hohen geisterey / geben  
sich nicht gefangen mit ihrem verstentnis zu  
glauben / das die heilige schrift durch vnd  
durch das eusserliche geprediget wort / nennet  
das Göttliche wort / wie es denn warhafftig  
ist / vnd Gott selbst solch wort nennet vnd heist  
sein wort / Ja die lieben Aposteln / nennen die  
mündliche vnd eusserlichen predigt des Euan  
gelij nicht anders denn das Göttliche wort /  
Vnd wiewol vnzeliche sprüche darüber gezeu  
gen sind aus der heiligen schrift / So wil ich  
doch den einigen anzeigen aus der ersten Epi  
steln Petri / welcher gnugsam ist alle die iheni  
gen zu rücke zu stossen / die da halten inn ihrem  
hohen geist / das das mündliche vnd gepredig  
te wort / nicht sey das wort Gottes / sondern  
ein menschen wort / vnd spricht also / Dabe  
24 euch



ench brünstlich lieb aus reinem hertzen / als die  
da widerumb geporn sind / nicht aus vergeng  
lichem / sondern aus vnuerhenglichem samen /  
nemlich / aus dem lebendigen wort Gottes /  
das da ewiglich bleibet / nach dem alles fleisch  
ist wie ein gras / vnd alle herligkeit des men  
schen wie ein blume des grasses / das gras ist  
verdurret / vnd die blume abgefallen / aber des  
Derrn wort bleibet inn ewigkeit / Das ist aber  
das wort / wilchs durch das Euangelium zu  
ench gebracht ist / inn welchem spruch der hei  
lige Petrus öffentlich saget / das die newe wid  
dergeburt geschehe durch den vnsterblichen sa  
men / das ist durch das wort Gottes / welchs  
zu vns gebracht ist durch die predigt des Euan  
gelij / Wir leugnen nicht / das die widergepurt  
von oben herab ist / vnd kömpt von dem vater  
aller liecht / Aber das müssen wir auch bekenn  
en / das solchs von oben herab kömpt / durch  
die eusserliche predigt des Euangelij / Ja eben  
darumb / das solche widergepurt von oben  
herab ist / so wird sie vns durchs eusserliche  
Euangelium gegeben / des selbigen sollen wir  
vns nicht scheuen / wie denn der heilige Pau  
lus zun Römern am ersten Cap. spricht / Ich  
scheme mich des Euangelions nicht / denn es  
ist ein krafft Gottes / die da selig macht / alle die  
dran glauben / Vnd wiewol der gleichen sprü  
che / als hieher viel zu bringen weren aus der  
heiligen schrift / so wil ich es doch bey diesem  
lassen bleiben / Warumb aber ich diesen vmb  
schweiff



schweiff gethan habe / ist nicht on vrsach geschehen / Denn wie L. F. G. mit ernstem vleis sorge getragen hat / fur die vnterthanen / das nicht vnter sie heimlich einriffe / der irthum der ihenigen / so vom Abendmal des Herrn nicht halten / das da sey inn brod vnd wein der warhafftige leichnam vnd warhafftig blut Christi / Also haben auch L. F. G. gantz vleissiglich vorhätten wollen / das neben solchem irthumb auch nicht eingrabelten die ihenigen / so die eusserlichen predigten nicht halten vor Gottes wort / sondern allein fur menschen wort vnd todten buchstaben / Solchen beiden irthumen fürzukomen / hat L. F. G. sich offt bemühet neben L. F. G. predigern / Auch mit sonderlichem vnd grossen vleis allenthalben / so viel möglich ist gewesen / dafür getracht / das nicht einreise solche hohe geisterey / durch welche irrig möchten werden / die einfeltigen inn L. F. G. Fürstenthumb / Derhalben auch L. F. G. gantz vleissig nach büchern getracht hat / aller der ihenigen / so widder solche irthumb geschrieben haben / Ja nicht allein die selbigen mit vleis vberlesen / sondern auch die büchlein des widderparths gelesen / inn welchen L. F. G. erfunden hat / nach den gaben von Gott L. F. G. verleihen / das der ihenigen grund nichts beständiges inn ihm habe / sondern mehr ein schleicher / hoffertiger geist sey / Was aber fur sorge mühe vnd arbeit L. F. G. gehabt hat neben vngespartem vleis / die warheit zu erhalten /



ten/vnd allen hertzlich zu dienen/vnd widder  
zu bringen/zur einigkeit des rechten verstands  
der einfeltigen wort Christi im Abentmal/ so  
jmands verführet were/mit vngegründtem ver/  
stand der selbigen wort/beweisen manchfal/  
tige hendel des Synodi zu Rastenburg / L. S.  
G. stad gehalten aus L. S. G. beneh durch den  
Erwürdigen Paulum Speratum Bischoff zu  
Pomezan/welcher gnugsam mit worten vnd  
schrifften / beide irthumb fur zukomen ge/  
handelt hat/vnd widderlegt alle ihre gründe  
aus Göttlicher schrifft/wie wol vorhin lan/  
gest solchs widderlegen geschehen ist/durch  
den getrewen Gottes diener vnd Doctor/  
Martinum Lutherum / neben seinen mitdie/  
nern vnd mithelffern der rechten Christlichen  
versamlung / als von Gott gelerten vnd fro/  
men Johannem Buggenhagium/Phlippum  
Melanchtonem vnd andere/welchen worten/  
schrifft vnd büchern/wolte Gott/das man als  
so grossen glauben gebe/als solche geister wol/  
len/das man ihren brieffen vnd büchlein glau/  
ben sol/Es haben dennoch nach solchem vleis  
(wie oben berurt)sich weiter L. S. G. zu dienen  
der liebe sich begeben / vnd zugelassen eine  
freuntliche / Christliche vnterreden mit etzli/  
chen zuthun / durch den ehegenanten herrn  
Paulum Speratum Bischoff zu Pomezan /  
vnd durch Doctor Johannem Brisinan/vnd  
herrn Johan Poliandrum/ inn L. S. G. gegen  
wertigkeit / das ja der rechte grund vnd war/  
heit an



heit an taze keine / vnd widderbracht möchten  
werden / so jemand sich verwickelt hette mit  
irriger lere / zu dem rechten erkentnis / ja auch  
vor diesem handel **L. F. G.** der warheit zu die-  
nen vnd der liebe / vnd allen **L. F. G.** vntersas-  
sen / mir befohlen aus dem Latein ins Deudsch  
zubringen dis Büchlein / welchs zusamen ge-  
bracht hat / aus der alten lerer vnd veter büch-  
er / Philippus Melanchthon / aus wel-  
chem büchlein clerlich beweiset wird / das die  
lieben Veter / auch die warhafftige alte Christ-  
liche Kirche / eben das selbige geleret vnd ge-  
glaubet haben / wie wir itzund leren vnd glen-  
ben / das warhafftig / leiblich gegenwertig sey  
im Abentmal der Herr Christus / sein war-  
hafftig fleisch vnd blut / im brod vnd wein etc.  
Solchem befehl nach **L. F. G.** hab ich auff  
das einfeltigest / solchs büchlein verdeudschet /  
Erstlich Gott dem allmechtigen allein zu loben /  
vnd mich zu beweisen / als einen gehorsamen  
vnterthanen gegen **L. F. G.** damit auch hertz-  
lich zu dienen allen menschen / so die warheit  
lieben / Verhoffe auch gantzlich / das solchs  
nicht sey widder meinen geliebten herrn vnd  
bruder Philippū Melanchthon / welchs vnters-  
richtung / vnd der andern meiner lieben veter  
vñ brudern zu Wittemberg / mich gantz vnters-  
werffe / vnd solch diese mein einfeltige arbeit /  
**L. F. G.** dieweil sie zu der ehre Gottes hochge-  
vliessen / vnd sich im Euangelio Christi stets  
vbet / zugeschrieben / der hoffnung / es werde  
vielen



vielen einfeltigen nützlich vnd tröstlich sein /  
vnd sie warnen für newen leren / mit vnterthe-  
niger bit / **L. F. G.** wöllen diesen meinen armen  
dienst inn gnaden auffnemen vnd erkennen /  
**Denn L. F. G.** gehorsamlich zu dienen / bin  
ich allzeit willig / **Damit wil ich L. F. G.**  
dem einigen barmhertzigem Gott  
befohlen haben. Geben in **L. F.**  
**G.** stad Königsberg inn  
Preussen / nach Christi  
geburt / **M. D. xxxij**  
am . xiiij. tag  
Martij.

**L. F. G.**

gantz williger vnter-  
theniger.

Michael Meurer von  
Denichen / Pfarrer  
im Lebenigt.



Philippus Melanch-  
thon/wündscht Friderico Wy-  
conio/ fried vnd gnad  
inn Christo.



Ze ich dir zugesagt  
habe / so vbersende ich dir die  
sprüche der alten Väter / von  
dem Abendmal des Herrn /  
welche bezeugen / das sie eben  
gehalten vnd glauben haben /  
was wir auch itzund halten vnd glauben / als  
nemlich / das der leichnam vnd das blut vn-  
sers Herrn / warhafftig sey gegenwertig im  
Abendmal / Wiewol aber der glaube nicht han-  
get / odder kömpt aus menschlichem zeugnis /  
sondern allein aus dem wort Gottes / doch weil  
die schrift wil haben vñ leret / das die schwachē  
sollen befestiget werden / von denen die da ster-  
cker sind / so ist es nützlich zuhaben / der Christ-  
lichen kirchen gezeugnis inn allen fällen der  
versuchung / Denn zu gleich als wir gerne vmb  
guten rad fragen / die lebendigen / verstendi-  
gen / von welchen wir wissen / das sie guten  
verstand von geistlichen sachen haben / Also  
acht ich auch zubefragen inn ihren schriftten  
die alten / welcher schriftten beweret vnd ange-  
nomen

B

nomen



nomen sein. Es sein auch andere sachen/wa-  
rumb ich der alten gezeugnis oder schrift nicht  
verachte/denn ich achte das gemeiniglich al-  
so gehalten hat die Christliche kirche/wie vnd  
was die selbigen alten geschriben haben/  
Tu ist es nicht zu rathen/ist auch nicht sicher/  
von dem gemeinen verstande der alten kirchen  
abzuweichen. Von etzlichen werden wir an-  
gesehen/ als die eins stumpffen verstands sein/  
das wir inn den worten des Euangelij/ **Das**  
**ist mein leichnam**/ nicht sehen/ ein an-  
der bedeutung odder vernewerung einer gleich-  
nis haben/wie denn in sich helt/nach der re-  
den meister lere/ der tropus Metaphora ge-  
nand/vnd das wir nicht verstehen/aus solcher  
weise zureden odder deutung/das wir entledi-  
get möchten werden/von vnzelichen vnd vn-  
endlichen fragen. Es lest sich ansehen vor eine  
narrheit/das man also feste halte vber dem  
synn odder verstand der vorigen wort/sinte-  
mal viel einen scheinbarlichern verstand mit  
sich bringet die selbige andere deutung/nach  
dem tropo Metaphore/ Die selbigen wer-  
den mich auch schelden/das ich inn solch-  
en sprüchen odder gezeugnissen der Veter  
nicht vermerckt hab/die vbertreffliche/heim-  
liche vnd geistliche meinung/ Es sind mir aber  
nicht vnwissend solche listige ertzneien (wie sie  
der Poet nennet/durch welche andere diesen  
sprüchen



sprüchen ein ertzney geben / Aber was kan man  
mit solcher weise vnd kunst nicht hinderlistig  
widderlegen vnd zunicht machen / so einem  
itzlichen macht vnd rhamm würde gegeben/  
aus seinem eigen kopff vnd willen / solche ho-  
he geistliche deutung zuertichten? Denn mit  
solcher weis haben etzliche hinderlistige mens-  
schen / die gantzē Christlichen lere in die Philo-  
sophey gemenget / vnd gantz vnd gar ein an-  
dere gestalt geben. Ich habe aber diese sprüche  
der Veter / gantz blos one alles glosieren vnd  
auslegung vorgetragen / auff das ich einem itz-  
lichen fromen vnd aufrichtigen leser / das vr-  
teil heimstellet vnd gebe / ob solche sprüche  
reden von der leiplichen gegenwertigkeit / od-  
der allein von der krafft odder würdigkeit / Ich  
halte es aber gewis vnd festiglich bey mir / das  
die Veter / aus den selbigen sprüchen festiglich  
vnd ernstlich bekennen / das der leichnam des  
Herrn warlich gegenwertig sey inn dem A-  
bendmal. Es haben etzliche on wahl vnd auff-  
sehen zusamen bracht / ein grosse zal solcher  
sprüch vnd gezeugnis / vnter wilchen viel vnges-  
wis sind vnd gantz finster / Aber wir haben al-  
lein die erfur bracht / welche nach vnserm an-  
sehen auff das aller klerste vnd offenbar sind.  
Origenes / wie denn sein gewonheit / spilet vnd  
hat lust mit den geistlichen auslegungen / also  
das man nichts gewisses aus seinen schrifften  
nemen mag. Es sein inn den büchern Hiero-  
nymi etzliche sprüche / welche gleich / wie sie  
B ij vnsern



vnsern verstand nicht befestigen Inn dieser sachen / also sind sie auch nicht hülfflich den widdersachern / Bey dem Gregorio Nazanzano / hab ich keinen spruch funden der gnugsam klar vnd helle were / Aus dem Basilio vermeldt vnd zeiget an Gratianus einen spruch / welcher vnserm verstande vnd meinung warlich nicht widder ist / Damascenum hab ich hie nicht angezeigt / welcher gantz vnd gar vnser meinung ist / vnd versicht auch die selbige / Vnd wiewol er nicht fast sehr einer aus den alten ist / doch halt ich es dafur / das er eben das geschrieben habe / das da lange zeit öffentlich die Kriechische kirche gehalten hat. Bessarion der verzelt viel namen der lerer / ich wolt aber viel lieber das er derselbigen lerer gantze spruch hette gesetzt / sonderlich darumb dieweil er von solcher grossen sachen wegen / ihm furgesetzt hatte eine gantze disputation zuthun / vnd Inn solchen orten sein wesen hatte / Inn welchen die schönsten libereien sein gewesen / vnd also vberflüssige zeit hat gehabt / das er ein gros buch voller lügen widder den Trapezontium geschrieben hat. Es hat Gratianus etzliche sprüche aus Augustino vnformlich vnd vnshicklich gezogen / zum Abendmal des Herrn / die werden erfur gezogen wider vns / aus welchen viel sehre bekömmert werden / wenn man aber solche sprüche eigentlich vnd mit fleis ansihet / so thun sie nichts zur sachen / Die Ihenigen die widder vns sein / bringen auff  
das



das allermeist aus den schriften der alten /  
nicht mehr denn zween sprüche / ihre meinung  
zubefestigen / Dne gewisse vnd feste gezeugnus  
wil ich nicht halten noch bekennen ein newe  
lere / welche mit sich zeucht den aller grösten  
fahl der aller grosten dinge / Denn es ist war-  
lich gar schwer dem gewissen / zu dulden vnd  
zutragen die vnruhe solcher erweckter zwit-  
tracht. Carolostradius welcher ein wilder ro-  
her mensch / one verstand / one lere / one syn-  
nen / vnd gemeine vernunfft / der hat zum  
ersten erweckt diesen auffrühr vnd zwittracht /  
welchen wir mit vleis vermarckt haben / das er  
nichts verstanden noch gethan habe / das et-  
was dienete zur leutseligkeit / schweige denn  
das wir hetten sollen odder können / inn ihm  
vermercken jrgend ein anzeigung des heiligen  
geistes / sondern viel mehr öffentliche zeichen  
der Gottlosigkeit. Inn aller seiner lere hat er ge-  
pfeget das Judenthumb widder einzufüren /  
vnd auffrühr zumachen / Er hat veracht alle  
gesetze von den Weiden auffgericht / Er hat  
allein dahin gedrunge inn gerichtts sachen  
zuhandeln / das gesetz Mose zugebranchen / vñ  
hat nicht verstanden / die krafft vñ eigenschafft  
der Christlichen freiheit / Vnd bald da sich im  
anfang erhaben hat die törichte lere der Wid-  
derteuffer / welche Nicolaus Storck hat an-  
gefangen auszubreiten in Dentschen landen /  
hat sie Carolstad angenommen / vnd die zwit-  
tracht von dem Abendmal des Herrn / hat er  
B iij ange



angefangen mit Doctore Martino Luthero/  
allein aus neid vnd hass / nicht aus liebe der  
Christlichen lere / Denn da er merckte / das  
sein bildestürmen vom Luthero ward umb-  
gestossen / da ward er gantz entzünd mit grau-  
samer begirlichkeit sich selbst zu rechen / vnd hub  
an vrsachen zusuchen / zugefallen dem gemei-  
nen pöfel / auff das er vnterdrückte gantzlich  
das gut gerücht Lutheri / Es mus ein gros teil  
Deudscher nation gezengnis geben / das ich  
nichts inn dieser sache erdichte / vnd so es von  
nöten sein würde zeugen zufüren / so werden sei-  
ne eigene bücher widder ihren schreiber / das  
aller warhafftigst gezengnis geben / inn wel-  
chen büchern klerlich erscheinet / das er aus kei-  
ner redlichen vnd vernünfftigen vrsachen (auch  
die auffs wenigst ein ansehen hette) beweget ist  
worden zuschreiben / O wie leuget er daher /  
lieblich nach seinem wolgefallen von dem zeich-  
en odder deutwörtlein tuto? Was bringet er  
vor ein gezengnis zu einer solchen grossen sa-  
chen der alten kirchen / odder jrgend ei-  
nen alten lerer? odder wo ist doch jrgend ein  
wortlein inn der gantzen disputation / inn wel-  
chem jrgend ein anzeigung sey Göttlicher ehre  
vnd furcht? Allein schreiet er daher / wie itzund  
vnter den trüncken / die groben handwercks  
leute pflegen zuschreien / welche keine grosser  
lust haben anders zureden / den von groben  
vnlästigen dingen / dazu ein gros teil seiner  
bücher handelt nichts anders / denn schenden  
vnd



vnd leſtern / vnd beſleiſſet ſich doch der gro-  
be menſch / den rhum danon zubringen / das er  
höſlich ſey .

Welcher ſich nu alſo vngeschiekt drin-  
get zu ſolchen groſſen ſachen / der zeigt öffent-  
lich an / das er ſich zu zeitlich inn fertigkeit ge-  
be / allein aus einer blinden begirlichkeit / vnd  
nicht beweget aus billigen vrfachen / odder  
aus liebe Göttlichs dienſtes / Alſo iſt nu Ca-  
rolſtadius dieſer lere der erſte herfürer / Es  
wolt aber Zwingli keinem andern das lob  
dieſer newen lere geben / denn ihm ſelbſt /  
Das ich aber ſolchs von Carolſtad ge-  
ſchrieben habe / das hab ich gethan vmb  
vnsrer nachtbarn willen / auff das / ſo et-  
was macht hat vnsrer gezeugnis / das ſie aus  
dem ſelbigen gewarnet / ſich mögen hüten vor  
dieſem Teuffel / Denn er hat wunderli-  
che liſt vnd künſte / vnd wunderliche geferbte  
werck vnd diſtbarkeit / durch wilche er ſich  
ſlickt vnd einwickelt inn die gemüte der men-  
ſchen / Wiewol er ſeine natur vnd eigenschaſt  
nicht lang kan verbergen / denn er hat ein ange-  
porn hitziges vnd vnrüziges hertz / derhal-  
ben er bald an tag gibt ſein ehrgeitzigkeit / ſei-  
nen zorn vnd neid / Ich hab auch angeſehen  
den Wigleſſ / welcher ſehr ſtürmet inn dieſem  
zancf / ich hab aber viel andere jrthumb inn  
ihm vermerckt / aus welchen man vrteilen mag  
ſeinen geiſt / Denn er gantzlich nicht verſtan-  
den / nach gehalten die gerechtigkeit des glau-  
bens /



bens/vnformlich vermischet er durch das bür-  
gerliche odder eusserliche regiment / vnd das  
Euangelium/vñ sihet nicht das vns das Euan-  
gelium zulest/das wir Christen zimlicher ge-  
setzen der lande / Stedte vnd vöcker / darunter  
wir wonen/mögen gebrauchen/ Er helt auch  
hart darauff/das die Priester nichts eigens bes-  
sitzen sollen/Item das man den zehenden / nie  
mand denn allein den / die da leren / geben sol/  
als verbiete das Euangelium zugebrauchen  
bürgerlicher ordnung / Von bürgerlichem regi-  
ment vnd herrschafft / disputirt er betrieglich  
vnd gantz auffrührisch / Auff solche weis we-  
schet er auch betrieglich vom Abendmal des  
D E X X N / widder die klaren wort / Es  
scheinet als habe man diese sache gehan-  
delt inn den alten Concilijs / Denn inn dem  
Decret wird angezeigt ein stück / des Ephe-  
sini Concilij / nicht zu vorachten / wolte Gott  
das die hetten die alten Canones / die am  
allermeisten itzund verfechten die gewalt der  
selbigen Canonum odder geistliche rechte / Sie  
haben aber nu keine solche alte Canones / denn  
allein die newlich gemacht sind / als von ih-  
rer gewalt vnd eusserlichem reich / auch von  
andern grossen herligkeiten / welche alle nichts  
dienen zur Christlichen kirchen / Ich wil aber  
gern folgen den alten Synodis / Denn als viel  
ich aus der alte gezeugnis kan ermessen / welche  
hin vnd widder inn den geschichten erfunden  
werden / so sehe vnd merck ich / das sie auff das  
aller



aller vleissigst gewesen sind / wle wir denn sehen  
das das Concilium Nicenum vleissig auff das  
Euangelion Johannis gesehen hat / Dñ Ganz  
grensis Synodus hat einen guten verstand  
der Christlichen freiheit gehabt / vnd wid  
der etzliche vnd besessene menschen / gleich  
wie vnser Widderteuffer sind / beschlossen  
vnd geordnet / wie man sich inn eusserli  
chen sachen / die nicht das Euangelion /  
sondern weltlich regiment antreffen / halten  
sol. Aber es ist jtz nicht von nöten zu erzelen  
alle Synodos / vnd was darin gehandelt ist /  
Das ist aber mein meinung / das es nicht zu  
radten odder zuthun sey / das man inn die  
Christliche Kirchen solche lare vnd opinion  
bringen wolle / die gar kein zeugnis noch  
grund hab von der alten Kirchen / die zu der  
Aposteln zeit / vnd bald darauff gewesen ist /  
Derhalben hab ich zusamen gebracht diese  
sprüche von dem Abendmal des Herrn / auff  
das wir gewisse gezeugnis der alten lerer vnd  
Veter hetten / inn welchen mechtig beweiset  
wird / das der ware leib des Herrn warhaff  
tig im Abendmal gegenwertig sey / Bitte du  
wollest solche arbeit von mir im  
besten annhemen / Gott be  
ware dich sampt den deis  
nen / Amen.

**C** Cyrillus



Cyryllus vber das. xv. Cap. Jo-  
hannis / da die wort gehan-  
delt werden / Ich bin  
ein rechter Weine-  
stock.

**U**nd zwar das leugnen wir nicht / das wir  
Christo mit rechtem glauben / vnd warer  
lieb vereiniget werden / Das aber leugnen  
wir vnd müssen sagen / das es gar widder alle  
schriffte sey / das gar keine weis sein sol / damit  
wir Christo leiblich / vnd nach dem fleisch ver-  
einiget werden / Denn welcher hat ihe daran  
gezweinet / das Christus auff die weis ein  
weinstock sey / vnd wir sind die reben / die von  
ihm das leben entpfahen / Höre was Paulus  
sagt. j. Corin. x. Wir sind ein leichnam inn Chris-  
to / spricht er / Denn wir viele sind ein leib vnd  
ein brod / dieweil wir alle eines brods teilhaff-  
tig sein / odder meint vielleicht jemand / das  
vns verborgen sey / die krafft des Sacra-  
ments / welches so es gehandelt wird / macht  
das Christus inn vns auch leiplich wohne /  
weil das fleisch Christi vns ist mitgeteilet /  
Denn warumb sind sonst der gelnbigen gelid-  
mas / Christi gelidmas. l. Wißt ihr nicht  
(spricht Paulus. j. Corin. vj.) das ewre leibe  
sind Christi gelieder / Solt ich nu die gelieder  
Christi nemen vnd huren gelieder draus mach-  
en? das



en<sup>e</sup> das sey ferne von mir. Es spricht auch  
selbst der seligmacher / Wer von meinem  
fleisch isset / vnd trincket von meinem blut/  
der bleibt inn mir vnd ich inn ihm / Davon  
wol zumercken ist / das wir nicht verstehen sol-  
len / das Christus allein inn vns sey / also das er  
inn vns mache vnd wircke die lieb / Sondern  
das er auch natürlich sich vns vereiniget. Dett  
gleicherweis so man ein weich wachs mit ei-  
nem andern weichem wachs vermischet / vnd  
also aus beiden ein wachs wird / Also auch/  
aus der gemeinschaft des leichnams / vnd des  
bluts Christi / ist er inn vns vnd wir inn ihm /  
Denn vnser verweslicher natürlicher leib / kan  
auff kein andere weis zu der vnuerweslich-  
en natur vnd leben komen / denn das ein ander  
leib eines natürlichen lebens mit vnserm leib  
vereinigt werde.

**Cyrrillus vber das vj. Cap. Jo-**  
**hannis / inn welchem die Jü-**  
den gestrafft werden / das sie sich  
geergert haben inn den worten  
Christi / von dem essen  
seines fleischs.

**E**s hette sich wol gezimet das die Jhentu-  
gen / welche die Göttliche krafft des selig-  
machers / auch die macht zeichen zu thun  
aus dem wunderzeichen verstanden hatten /  
C ij auch



auch seine wort on widderrede hatten angeno-  
men/vñ so sie sich hetten lassen dünckē/das etz-  
liche schwer zinnerstehen weren/das sie ihn ge-  
fraget hetten/wie sie es verstehen solten/aber  
sie thun das widderspiel vnd schreien zusamen/  
Wie kan dieser sein fleisch vns geben? Johan.  
vi/ lestern also Gott vnd dencken nicht ein-  
mal daran/das Gott nichts vnmöglich sey/  
Denn dieweil sie natürliche vnd fleischliche  
menschen sind/können sie nicht verstehen die  
geistliche dinge/als Paulus spricht. i. Corin. ij.  
sondern achten dis grosse heimlich verborgen  
ding / für ein narheit/Wir aber (bit ich) sol-  
len vns ihr sund nützlich machen vnd daraus ler-  
nen/das wir mit einem starcken glauben/sol-  
che heimliche ding fassen vnd wedder gedens-  
cken noch reden von solchen hohen sachen/  
wie die Jüden danon reden/wie es möglich  
sey/odder wie es zugehe/ Die Jüden sollen als  
so reden/vnd ihr straff darumb leiden/Chris-  
tus wolt es von Nicodemo auch nicht leiden  
da er sprach/Wie können solche ding gesche-  
hen? sondern schalte ihn darumb vnd sagt/  
Bistu ein meister inn Israel vnd weist das  
nicht? Darumb sollen wir aus ander leut schas-  
den gelerter vnd klüger werden / vnd wenn  
Gott etwas wirckt/sollen wir nicht fragen/  
wie es zu gehe/sondern sollen ihm das heim-  
stellen/was für weis/weg vnd kunst er dazu  
branche/ Denn gleicher weise wie niemands  
nach der natur erkent noch weis / was Gott  
sey/



sey/vnd wird doch durch den glauben gerecht  
fertigt/so er gleubet das er wird die belonung  
geben/denen die ihn suchen / Also auch wenn  
du seiner werck grund vnd vrsach nicht weißt/  
vnd dennoch nicht zweifelst/das er alle ding  
vermüg/ wirstu nicht ein geringe belonung  
dafur empfangen / denn Gott foddert selbs  
durch den Propheten Esaiam von vns/das  
wir so von ihm halten sollen / Meine gedan  
cken sind nicht ewer gedancken/vnd ewer we  
ge sind nicht meine wege / spricht der Herr /  
Sondern souiel der himel höher ist/denn die  
erden / so sind auch meine wege höher denn  
ewer wege/vnd mein gedancken/den ewer ge  
dancken/Dieweil nu Gott also alles vbertrifft  
inn seiner weisheit vnd krafft/ Warumb solt er  
auch nicht so wunderlich wirken mögen/das  
wir seiner werck grund vnd vrsach mit vnser  
vernunft nicht kundten begreiffen/ Sehen  
wir doch offft / was die menschlichen hand  
wercksteute thun vnd machen? Vnd ob vns  
gleichwol düncket / das sie vns vngleubige  
ding sagen / dennoch wenn wir sehen das sie  
zunor der gleichen etwas gemacht haben /  
glauben wir ihn desto leichter/ das sie solchs  
vermögen / dauon sie vns vorhin gesagt ha  
ben/Darumb sind die werd/das man sie auff  
das hertest straffe/die Gott den schepffer aller  
ding also verachten vnd verschmehen/ das sie  
also dünstig vnd küne sein zu reden inn seine  
werck/vnd fragen wie das vnd das müglich



sey obder zu gehe/well sie doch wissen/das er  
allein alle weisheit gibt vnd geben kan / vnd  
wie vns die schrift gelernet hat vnd leret /  
das er alle ding vermöge? Ob aber die Jüden  
ja nicht ablassen wollen/vnd fragen/so fra-  
ge ich auch/wie es doch zu habe gangen/da  
sie aus Egypten gezogen sind / Item / Wie die  
ruth Moses verwandelt sey inn ein schlan-  
ge? Wie die hand Mofi ist anssetzig / vnd  
widderumb inn einem augenblick gesund  
worden ist / Wie die wasser inn blut verwan-  
delt? Wie ihre Veter mitten durchs mehr sind  
gegangen? Wie durch das holtz/das wasser  
süß worden ist? Wie das wasser geflossen ist  
aus dem fels/da Moses an den felse mit der  
rutten schlug / Wie der Jordan stillgestanden /  
wie die vnderwindliche Stad Jericho allein  
von dem geschrey der kinder von Israel vmb  
gefallen sey / Solcher anderer stück / sind vnze-  
lich viel inn welchen / so du sie nicht ehr glen-  
ben wilt / denn du wiffest vrsach vnd weis/  
wie es möglich sey gewesen / wirstu die gantze  
schrift / Mosen vnd alle Propheten vmbke-  
ren vnd leugnen müssen / Warumb habt ihr  
Jüden denn auch nicht Christo geglaubet? od-  
der wo ihr euch hettet lassen däncken/das et-  
was zu hoch were inn seinen worten / ihn de-  
mütig gebeten / vnd nicht als die trunckenbö-  
tze schreien / Wie kan dieser vns sein fleisch gebe  
zu essen? Merckt ihr nicht das ihr mit solchen  
worten / nichts denn ewren grossen stoltz vnd  
hohmut anzeiget? Vnd



## Vnd darnach.

Warlich warlich ich sage euch/  
werdet jr nicht essen vom fleisch  
des menschen sons / vnd trin-  
cken von seinem blut / so habe  
jhr kein leben jnn euch etc.

**C**hristus ist warlich gantz barmhertzig vnd  
senssemütig / als wir denn an allen seinen  
wercken spüren / Denn er antwort ihn  
nicht hart / wie sie wol verdienet hetten / vnd  
zancet sich auch nicht mit ihn / sondern beveis-  
sigt sich nur / wie er jnn ihre hertzen / den ver-  
stand dieses geheimnis / welcher das leben mit  
sich bringet / bildet. Sagt ihnen nicht viel da-  
von / wie er sein fleisch zur speis geben werde /  
denn er sihet das sie es nicht fassen können /  
sondern da arbeitet er hin / was fur grosse gü-  
ter ihn daraus entstehen werden / wenn sie mit  
dem glauben sein fleisch essen / das sie also  
durch die grosse begirde des ewigen lebens /  
zum glauben getriben werden / welcher glaub  
darnach one mühe solche wunderwerck lernet  
vnd fasset / denn also sagt Esaias am vij. Es  
sey denn das ihr glaubt / so werd ihr nicht ver-  
stehen / Derhalben war es von nöten / das  
man zum ersten des glaubens grundfest jns  
hertz legte / vnd darnach nach dem fraget /  
was



was ein mensch fragen sol/ Diese aber fragten  
ehe sie glaubten/ vnd das ist auch die ursach/  
das ihn der Herr darauff nicht antwortet wie  
es zu gehe/ sondern vermanet solehs zusuchen  
mit vnd inn dem glauben/ Also gibt er auch  
den glaubigen Inagern das gebrochen brot/  
vnd spricht/ Nempt hin vnd esset/ das ist mein  
leib/ vnd darnach den kilch/ vnd spricht/ Das  
ist der kilch meines bluts/ welchs fur viel ver-  
gossen wird zur vergebung der sunden/ Alhie  
sibestu ja/ das er den ihenigen so one glauben  
gefraget/ nicht entdackt hat die weise dieses  
geheimnis/ Den glaubigen aber die da nicht  
gefragt haben/ hat ers ausgelegt.

Die sollen nu zuhören alle die/ welche  
aus vbermut den glauben Christi noch nicht  
wollen annemen/ Es sey denn das ihr esset  
(spricht er) das fleisch des menschen sons/ vnd  
trinetet sein blut/ so werdet ihr nicht inn euch  
haben das leben/ Denn diese können der heil-  
igung vnd des ewigen lebens nicht teilhafftig  
werden/ welche durch die heimliche benedei-  
ung Ihesum nicht annemen/ Denn der ist von  
natur das leben/ der aus dem lebendigen wa-  
ter geborn ist/ vnd seinen eigen leib lebendig  
machen kan/ Denn der selbige leib ist vnaus-  
sprechlicher weise/ dem son Gottes vereinigt/  
von welchem alles was sich reget das leben  
hat/ Derhalben ist der leib vnd menschliche  
natur mit dem son Gottes ein person nach  
dem



Dem er mensch worden ist / vnd bleibt auch ein  
person mit dem selben leib / das man ihn inn  
keine stück danon scheiden kan / on allein das  
das wort / Gott des vaters / vnd der leib / den er  
von der Jungfrawen Maria genomen / zwo  
natur sind / vñ ist gleichwol ein person mit dem  
wort worden / durch eine vereinigung die man  
mit worten nicht ansreden noch fassen kan /  
Darumb weil vnfers seligmachers fleisch /  
das leben danon hat / das es mit dem wort  
Gottes / welchs natürlich das leben selbs ist /  
vereiniget ist / folget / das auch wir das leben  
inn vns haben / wenn wir dasselbige fleisch  
essen / vnd also mit dem fleisch vereinigt wer-  
den / welchs das leben worden ist / Vnd dis ist  
auch die ursach das Christus / wenn er die tod-  
ten auffwecket / nicht allein des worts vnd sei-  
ner Göttlichen krafft / als ein Gott brauchet /  
sondern name zu zeitten auch seine hand dazu /  
das sie mit wirckete / Das er also mit der that  
anzeiget / das auch sein fleisch / weil es mit ihm  
vereinigt ward / das leben geben kondte / vnd  
er also die seinen leret / das es ja sein / vnd nicht  
eins andern leib were / Denn also schreiben die  
Euangelisten / da er des Obersten inn der schul  
tochter von todten auffwecket / das er sie bey  
der hand genomen hab / vnd sie auffgerichtet  
vnd gesagt / Meidlin stehe auff. Also hat er sie  
auffgeweckt als ein rechter Gott / mit dem  
wort / vnd damit / das er sie mit seinem leib an-  
rüret / vnd der einige Christus brauchet zu die-  
sem einigen

D sem einigen



sem einigen werck / also beide natur / die Göttliche vnd menschliche / Gleich also thet er ihm auch / da er zur Stad Nain hinein gienge / vnd man ihm entgegen truge der Witfrauen son / gehet er zum sarg / vnd rüret ihn an / vnd sagt / Jüngling / ich sage dir stehe auff / Da sibet man ja / das er nicht allein mit dem wort / die todten auffwecket / sondern brauchet auch seinen leib dazu / das wir ja sehen solten / wie auch sein fleisch die krafft habe / das es das leben gebe / Weil nu die todten allein dauon / das sie Christus mit seinem fleisch anrüret / widder lebendig werden / wie kan es möglich sein / das wir nicht solten leben / **Welche wir das selbige fleisch genießen vn essen?** Denn es wird ja die ihenigen / welchen es mitgeteilt wird / gantz vnsterblich machen / Die sollen wir vns aber fursehen / das wir nicht / wie die Jüden / fragē / wie es zu gehe oder möglich sey / sondern daran gedenccken / das das wasser ob es wol von natur kalt ist / dennoch wenn es zum feuer kömpt siedheis werde / Denn also gehet es eben mit vns auch zu / wiewol wir vnser fleischs halben von natur sterblich sind / dennoch wenn vns das leben mitgeteilt wird / höret vnser schwachheit auff / das wir dem leben ehlich werden / Denn es mus wol also sein / das nicht allein vnser sel durch den heiligē geist / inn das ewige leben kome / sondern auch vnser grober jrdischer leib / vnsterblich werde aus dem



dem genieffen / essen / vnd anrüren des fleischs  
Christi.

Chriſtoſtomus inn das vi. Ca-  
pitel. Iohannis / Homi-  
lia. XLV.

**A**ls bald der gedanken kömpt / das man  
fraget wie es zu gebe / so kömpt auch der  
vnglaub / wie wir sehen / das auch Nico-  
demus gar irre drob wird / da er sagt / Wie kan  
ein mensch widder inn mutter leib gehen ? Als  
so gehet es den Jüden hie auch / wie kan vns  
dieser sein fleisch zu essen geben ? Lieber wenn  
du doch so gar wissen wilt wie es alles zu gebe /  
warumb fragstu auch nicht / da er mit den  
funff brodten das grosse volck speiset ? wie es  
doch zu gangen sey / das das brod so weit hat  
reichen mügen / Aber sie hetten dazumal den  
bauch vol / das sie nicht viel nach dem wun-  
derzeichen fragten. Ob aber jmand sagen wol-  
te / es het dazumal keines fragens bedurfft /  
weil sie es fur augen sahen / Soltestu aus dem  
selben wunderzeichen lernen / vnd gleben das  
ihm dis hie auch leicht zuthun / Denn darumb  
hat er ihenes wunder zuor sehen lassen / das  
sie deste leichter der predig / die er drauff thut /  
glaubeten / Aber sie habens ihnen nicht nütz  
gemacht / wir aber sollens vns nutz machen /  
Darumb wollen wir auch itzund erzelen / was  
D ij fur



für grosse geheimnis vnd nutz darin sey / vnd  
warumb es geschehen sey / vnd weil wir ein leib  
sein / vnd gelidmas aus seinem fleisch / vnd kein  
von seinem gebein / sollen wir vleissig seiner lere  
vnd predigt folgen / Denn die speise die er vns  
geben hat / machet das wir ein ding mit seinem  
fleisch werden / nicht allein nach der wirkung  
vnd lieb / sondern leiblich / Denn da er vns an-  
zeigen wolt / wie lieb er vns hette / hat er seinen  
leib mit vnserm vermischet / vnd ein ding draus  
gemachet / das das heupt vnd der leib eines  
würde / Denn das ist ein zeichen der lieb .

Chrysofostomus vber das xxvi.  
Cap. Matthei. Homi-  
lia. LXXXII.

**E**s gilt hie vleissig auffsehens / denn es  
wird nicht ein geringe straff vber die ge-  
hen / so das Sacrament vnwirdig nemen /  
Dencke nur daran / wie hart du dich erzürnest  
vber den Judam den verretter / vnd die Jüden  
die Christum gecrentzigt haben / vnd sihe dich  
wol für / das du nicht auch schuldig werest /  
des leibs vnd bluts Christi / Sie haben ihn  
jenmerlich erwürget / Du aber nach dem er dir  
soniel zugut gethan hat / ferest gleich wol fort  
inn deinen sünden / so er ihm doch nicht daran  
genügen lesset / das er mensch wird vnd lest sich  
martern / sondern machet auch aus dir vnd  
ihm



ihm (also zu reden) einen Klumpen/nicht allein  
nach dem glauben/sondern er macht das wir  
wesentlich mit seinem leib vereiniget werden/  
Daraumb sollen die reiner sein/die von diesem op-  
ffer essen wollen/Vnd die hand die dieses Sa-  
crament angreiffet/der mund der mit dem geist-  
lichen feuer gefüllet/die zunge die mit dem  
theuren blut geröttet wird/vbertriffet weit  
Son vnd Mond mit ihrem schein. Dencke nur  
dran was für ein ehr dir dein Gott anlege/vnd  
was für ein tisch du habest/Denn dafür sich  
alle Engel entsetzen/welchs sie one furcht vnd  
zittern nicht ansehen können/das selbe ist vnser  
speis/vnd wir werden ein ding mit ihm/ein  
einiger leib Christi/vnd einiges fleisch/Wer  
nu hie wort gnug hette/das er Gottes krafft  
vnd lob preisen/erzelen köndt/Sindestu auch  
jrgend einen hirtten der seine schaff mit seinem  
eigen fleisch speiset? Das sehen wir wol das et-  
liche mutter ihr kinder selbs nicht seugen. Das  
thut aber Christus nicht/sondern speiset vns  
mit seinem eigenem fleisch/vnd menget also sich  
inn vns vnd henget vns an sich/Es möchte  
aber imand hie fragen/ob auch solche güter  
allen widderfaren/denn so sich Christus her-  
unter inn vnser natur gestickt hat/ist es offen-  
bar/das er vns allen vnd ein jeden inn sonder-  
heit zugut kómen sey/wie gehet es denn zu/  
das sie nicht alle sein genieffen vnd selig wer-  
den? Die mercke/das der feil ja an ihm nicht  
ist/denn er wolts von hertzen gerne/aber an

D iij. denen



denen ist der feil / die ihn nicht haben wollen.  
Denn er gibt sich durch dis geheimnis des  
Sacraments einem iglichen glenbigen / vnd  
neeret selber die / die er geporn hat / lest sie  
nicht andere neeren / das er dich ja gewis ma-  
che / das er dein fleisch an sich genomen habe /  
Darumb weil er solche lieb gegen vns erzeiget /  
vnd vns so grosse ehr angeleget hat / sollen wir  
vns auch wacker stellen vnd nicht faul sein /  
Sibe / wie die kleinen kindlin so begirig der  
mutter nach dem zitzen schnappen / wie fesse sie  
das wartzlein mit dem munde halten. Also sol-  
ten wir auch mit grosser lust vnd begirde zu  
diesem tisch gehen / vnd das geistlich wartzlein  
dieses kiches fassen / Ja wir solten auch mit  
größerer begirde des heiligen geists gnade sau-  
gen / denn die kinder den zitzen / vnd es dafür  
halten / das vns nichts ergers noch elenders  
begegnen köndte / denn so wir dieser geistlichen  
speis beraubet würden / Es ist nicht menschen  
krafft noch werck / Sondern der dazumal dis  
Abendmal zubereit hat / der bereit es noch  
heutiges tags zu / vnd wirckts allein / Wir sind  
allein diener dazu / Er aber ist der es heiliget  
vnd endert.

Chrysofomus von der  
würdigkeit der  
Priester.

Welch



**W**elch ein grosses wunderzeichen /welch  
ein grosse lieb gegen vns ist das /das der /  
der da sitzet zur rechten des vaters zu der  
stund / inn den henden der Priester gehalten  
wird /vnd sich so dar gibt allen die ihn vmbfa-  
hen / vnd haben wollen.

### Dulgarius vber den Euange- listen Mattheum.

**E**r hat nicht gesagt / Das ist ein zeichen mei-  
nes leibs / sondern das ist mein leib / vnd  
also auff das brod gedentet / das ja nie-  
mand meinen sol / das das brod vnd wein /  
welche man sibet / nur ein zeichen sein.

### Dulgarius vber den Euan- gelisten Marcum.

**N**ach dem er aber gedancket hette / brach  
er das brod / wie wir auch thun / vnd des  
zu betten / **Das ist mein leib /** das  
(sag ich) das ihr von mir nemet / Denn das  
brod ist nicht allein ein figur vnd zeichen des  
leibs Christi / Sondern das brod wird inn den  
leib Christi verwandelt / denn Christus sagt /  
Das brod das ich euch geben werd / ist mein  
fleisch / Er sagt nicht also / Es ist ein figur odder  
zeichen meines fleischs / sondern es ist mein  
fleisch



fleisch / Vnd Abermal / Es sey denn das ihr des  
menschen Sons fleisch essen werdet / Warumb  
sagstu denn / Ey sibet man doch nur das brod /  
vnd nicht das fleisch? Denn das geschicht  
vmb vnser schwachheit willen / denn fur dem  
wein vnd brod scheuen wir vns nicht / weil  
wir es gewohnet sind / fur dem blut aber vnd  
fleisch würden wir vns scheuen / Darumb hat  
vnser gnediger Gott vnser schwachheit zugut /  
brod vnd wein lassen bleiben / welchs er doch  
inn fleisch vnd blut heimlicher weise verendert.

### Hilarius im Achten buch von der Dreifal- tigkeit.

**W**enn nu das war ist / das Christus war-  
hafftig vnser fleisch an sich genomen  
hat / vnd der mensch / der von Maria der  
Jungfrauen geporn ist / der rechte Christus  
ist / vnd wir warhafftig vnter dem geheimnis  
das fleisch seines leibs genießen / vnd durch  
das selbe ein ding mit ihm werden / Denn der  
vater ist inn ihm / vnd er inn vns / So kan man  
ja nicht sagen / das er allein also mit vns eins  
sey / das er vnser freund ist / sondern das er im  
Sacrament sich leiblich mit vns vereiniget.  
Denn was Gottes werck vnd sachen sind /  
danon sol man nach vnser vernunft nicht re-  
den noch vrteilen / vnd den reinen verstand der  
himlischen



Himlischen wort / mit freueln glosen nicht ver-  
keren / Sondern das / das geschrieben ist / sol-  
len wir lesen / vnd wenn wirs gelesen haben /  
mercken / vnd denn mit einfeltigem glaubē da-  
ran hangen / Denn es kan sonst nicht möglich  
sein / das wir recht dauon reden / wie Christus  
warhafftig vnd leiblich inn vns sey / wenn  
wirs nicht von ihm lernen / wie wir dauß reden  
sollen / Er aber sagt / Mein fleisch ist die rechte  
speisse / vnd mein blut der rechte tranck / Wer  
nu mein fleisch isset / vnd mein blut trincket / der  
bleibet inn mir vnd ich inn ihm / Derhalben ist  
gar kein zweifel / das es warhafftig fleisch vnd  
blut sey / vnd das darümb / das ers selbs mit  
klaren ausgedruckten worten sagt / vnd wir es  
also glauben / Wer es nu isset vnd trincket / der  
hat das dauon / das er in Christo / vnd Chri-  
stus inn ihm ist / Das ist gewislich war / die  
ihenige aber haltens nicht für war / die Chri-  
stum Ihesum nicht für waren Gott halten /  
Darümb ist er leiblich inn vns durch sein  
fleisch / vnd wir sind in ihm / weil das / das wir  
sind / mit ihm inn Gott ist / Das wir aber inn  
ihm sind durch das Sacrament / inn welchem  
vns sein fleisch vnd sein blut mitgeteilt wird /  
zeuget er selbs / da er spricht. Die welt sihet mich  
nicht / ihr aber werdet mich sehen / denn ich  
lebe / vnd ihr solt auch leben / Denn ich bin inn  
meim vater / vnd ihr seid inn mir / vnd ich inn  
euch. Nu wenn es nur ein solche einigkeit solt  
sein / das er vns lieb hat vnd vnser freund ist /

**E** was



was were es von nöten / das er die weise der  
vereinigung so vnterscheidet / Aber die selb vnterscheid  
gehbet darauff / das / wie er der Gott-  
heit nach / natürlich im vater ist / also auch wir  
leiblich inn ihm sind / durch seine leibliche ge-  
purt / vnd er widderumb inn vns sey / durch  
das geheimnis der Sacrament / Das wir also  
lernen sollen / das anskrafft vnsers mitlers / ein  
gantze vollkomene vereinigung geschehe / das  
wenn wir inn ihm bleiben / er inn dem vater  
bleibe / vnd er / wenn er inn dem vater bleibet /  
inn vns bleibe / das also ein ding draus wer-  
de / Dieweil Christus natürlich nach seiner  
ewigen gepurt im vater ist / wir auch natürlich  
inn ihm sind / weil er natürlich inn vns bleibet /  
Das aber solch einigkeit natürlich inn vns sey /  
zeuget er mit diesen worten / da er spricht / Wer  
mein fleisch isset / vnd mein blut trincket / der  
bleibet inn mir vnd ich inn ihm.

Wie mich mein vater gesand hat / der da  
lebet / so lebe ich auch durch den vater / vnd  
welcher mein fleisch isset / der wird auch leben /  
durch mich / nu lebet Christus durch den va-  
ter / darumb wie er durch den vater lebet / also  
werden auch wir leben durch sein fleisch / Das  
ist aber die ursach das wir leben werden / das  
Christus inn vns bleibet durch sein fleisch /  
Darumb werden wir auch leben durch ihn  
eben auff die weise / wie er durch den vater le-  
bet / Darans wil nu folgen / weil wir natürlich  
durch



durch krafft seines fleischs/welchs natur durch  
das Sacrament mit vns vereinigt wird/lebē sol  
len/das er auch natürlich nach dem geist/den  
vater inn sich habe/weiler durch den vater le-  
bet. Das alles erzele ich darumb/das die ketzer  
vnuerschampt liegen/es sey zwischen dem son/  
nur ein einigkeit des freundlichen willens/vnd  
beweren das mit dem Exempel / Es sey gleich  
eine solche einigkeit/wie sie zwischen vns vnd  
Gott ist/eben als werden wir ein ding mit dem  
son/vnd durch den son ein ding mit dem va-  
ter/allein nach dem gehorsam gegen Gott /  
vnd nicht auch ein natürliche vnd leibliche ei-  
nigkeit durch das Sacrament seines fleischs  
vnd bluts / So man doch also predigen solte/  
das wir durch die ehre die vns geschehen /  
Gottes kinder vnd warhafftig vnd natürlich/  
ein ding mit ihm worden sind/durch den son  
der leiblich inn vns ist / vnd leiblich mit vns  
durch das geheimnis vereinigt ist.

### Cyprianus ad Ceciliam.

**S**arnach mus man fragen wem sie gefol-  
get habē/Denn so man in diesem opffer/  
welchs allein Christus selbs ist/niemand  
denn Christo nachfolgen sol/sollen wir ihm  
ja folgen / vnd das auch thun das Christus  
gethan hat / vnd geboten das mans thun  
sol.

**C ij** Cyprianus



Cyprianus jnn der predigt vom  
Abendmal des Herrn / so an-  
ders der titel recht ist / Denn es  
habe dieselben predigt gemacht  
wer da wolle / so libet man  
dennoch wol / das sie  
so newlich nicht  
gemacht  
ist.

**D**as brod das Christus seinen Jüngern  
reichet (welchs die vorige gestalt behelt/  
vnd gleichwol ein andere natur hat) ist  
durch die allmechtige krafft des worts / fleisch  
worden / Vnd gleicherweis wie man jnn der  
person Christi allein die menschliche vnd nicht  
die Göttliche natur sahe / also ist es hie/  
vnd das Göttliche wesen hat sich jnn  
das Sacrament / das wir fur augen sehen /  
auff ein vnaussprechliche weise / eingefencket/  
das man dieses Sacrament hoch vnd heer  
hille / vnd zu der warheit / welche leiplich  
im Sacrament ist / einen reinen zutrit hette / das  
wir des geistes auch teilhaftig würden.

Ireneus li. v. contra Valent.

am. 424. blat.

Dis:



**S**IS sind aber gar vnnütze / vntüchtige  
leut / die alle ordnung Gottes so frech  
verachten vñ sagen / das das fleisch nicht  
müße selig vnd von newen geporen werden /  
vnd haben des keinen andern grund denn  
das sie sagen / das fleisch könne die verwesliche  
natur nicht hinweg legen / Aus dem müste  
auch das folgen / das vns Christus mit seinem  
blut nicht erlöset hette / vnd das vns weder  
im kelch sein blut / noch im brod / welchs wir  
brechen / sein leib mitgeteilet würde / Denn es  
ist kein blut / auffer den adern vnd dem fleisch /  
vnd andern gliedern / die am menschen sind /  
welche das wort Gottes warhafftig an sich  
genommen hat / vnd vns darnach mit seinem  
blut erlöset / wie der Apostel auch sagt / In  
Christo haben wir die erlösung durch sein  
blut / vnd vergebung der sünden / weil wir aber  
sein gliedmas sind / neeret er vns auch durch sein  
geschöpff vnd gibt vns die selben / Denn er  
lesset seine sonnen vber vns auffgehen / vnd reg-  
net wie es ihm gefelt / vnd gibt den tilch / vnd  
hat sein eigen leib dazu geordnet / das vnser  
leib dauon wachsen vnd zunemen sollen / Da-  
rumb wenn zu dem eingeschenkten tilch / vnd  
gebakenen brod / das wort Gottes kömpt /  
so wird der leib vnd das blut Christi drans /  
von welchem vnser fleisch wechset vnd erhalten  
wird / Wie können sie denn das leugnen / das  
vnser fleisch nicht müße teilhafftig werden der  
gaben Gottes / welcher das ewige leben ist / so

¶ iij. es doch



es doch gespeiset wird / mit dem leib vnd blut Christi.

Eben aus solchem grund schleust Ire-  
neus an ein andern ort / das das fleisch nicht  
könne gantz verwesen vnd vmbkomen / weil  
es gemehret wird mit dem leib Christi. lib. 4.  
widder Valent. pag. 237.

Wie können sie denn sagen / das das fleisch  
gantz verwese / vnd nicht mehr zum leben ko-  
me / welchs doch mit dem leib vnd blut Chri-  
sti erneeret wird.

## Vnd bald darnach.

**D**enn gleicher weis / wie das brod / das  
aus der erden wechset / nicht mehr ein  
schlecht gemeines brod ist / wenn es Gott  
mit seim wort anders nennet / sondern ist ein  
Sacrament / welchs aus zweien stücken ge-  
macht ist / aus ein jrdischen vnd himlischen /  
Also werden auch vnser leib vnerwesentlich /  
wenn sie dis Sacraments genieffen.

## Ambrosius.

**E**s sind zwey bücher vorhanden / die man  
S. Ambrosio zuschreibet / eins de inician-  
dis misterijs / das ander / de Sacramen-  
tis / jun



Es / inn welchen klar angezeigt wird / das  
das brod / nicht allein / wie Zwingli leret /  
bedeute den leib Christi / sondern das leib  
hafftig der ware leib Christi im Abend  
mal gereicht werde / Meines bedünckens / sind  
dieselben zwey bücher / den andern büchern / die  
Sanct Ambrosius gemacht hat sehr ehlich /  
vnd im letzten zeucht ehr an etlich gretlich  
wort / wie er sonst pfleget / Aber es ligt daran  
nicht viel / Gott gebe es habe sie S. Ambrosius  
selbs gemacht odder ein ander / sie werden den  
noch fast vmb die selben zeit geschriben sein /  
da Ambrosius gelebt hat / Denn es wird auch  
darin gemeldet der alte brauch / wie man ge  
taufft habe / die aller erst inn ihrem alter zum  
Euangelio komen sind. So gedenckt er auch  
nur zweier Sacrament / der tauff vnd des  
Abendmals / Da selbst stehet also geschrie  
ben.

Du möchtest aber sagen / Ich sihe ein  
anders / wie kanstu denn sprechen / das ich den  
leib Christi neme / Wolan dis stück hab ich  
noch zu bewerren / was wollen wir aber für  
gleichnis dazu nemen / das wir bewerren / das  
das brod nicht mehr sey das / das man sihet /  
sondern das / das die wort geben / Item / das  
die wort hie krefftiger sind denn die natur /  
Denn die wort mügen auch die natur endern  
wie wir an Mose sehen / der hat ein rütlin inn  
der hand / bald ers aber weg wirfft / wird  
ein schlange draus / widderumb da er die schlan  
gen bey



gen bey dem schwantz greiffte / wirts widder  
ein rütklin wie vor / Die sibestu ja das die natur  
zwey mal geendert ist inn der schlangen vnd  
dem rütklin / aus der gnad die der Propheet het  
te / Also auch flosse fein reines wasser inn E-  
gypten / vñ wird vnuersehens zu blut / das das  
wasser nimmer tuchte zu trincken / Bald aber  
der Propheet bettet / wurd es widder rein  
wasser / Also waren die Jüden allenthalben  
am roten Meer beschlossen zwischen dem ge-  
birge / bald Mose die ruten auffhebt / zuteilt  
sich das tieffe Meer zu beiden seiten / das es  
siehet wie zween berge / vnd ein fein richtige  
truckne strassen dadurch ist / Also auch der Jor-  
dan / laufft widder sein natur zurück / Da si-  
het man das beide / das Meer vnd der Jor-  
dan / aus ihrer natur treten / Also auch da das  
volck inn der wüsten durstig war / rüret Mose  
allein mit ein rütklin den berg an / so springt ein  
feines frisches wasser heraus / Ist aber das  
nicht auch ein werck der gnaden / gantz vnd  
gar widder die natur / das ein Felse sol wasser  
geben / da doch von natur kein wasser innen  
ist / Also gieng es auch mit dem wasser Ma-  
rath / welchs so bitter war / das man es nicht  
trincken konde / da Moses das holtz hinein ge-  
worffen hett / vertriebe die gnad den bitteren  
schmack / der von natur drinne war / Zur zeit  
Elisei des Propheeten / siehle eins Propheeten  
son sein Beihel aus der hand inn das wasser /  
vnd sanct zu bodem / Da bad er Eliseum / der  
thet



thet nicht mehr/denn das er ein holtz inn das  
wasser warff/da schwumme das Beihel empor  
vber dem wasser/ Das ist ja auch widder die  
natur des eifens / das es sol vbersich schwim-  
men im wasser/ Also sehen wir inn diesen stü-  
cken allen/ das die gnade krefftiger vnd stercker  
ist denn die natur/ Wir haben aber nur die Ex-  
empel der gnaden angezogen/ die von den Pro-  
pheten geschehen sein/ So nu der segen den die  
menschen sprechen / die natur also verendern  
kan/ was wollen wir denn sagen von dem se-  
gen/ welchen Gott selbs spricht / da die wort  
vnfers Herrn vnd seligmachers selbs gewal-  
tiglich wircken? Denn das Sacrament das  
du nimpst/ das wird gemacht durch die wort  
Christi/ Sol nu Delias wort so mechtig sein/  
das das feuer vom himel falle / so mus auch  
Christus wort wol so mechtig sein / das es  
brod vnd wein im Sacrament verwandelt /  
Stehet doch von der schöpffung der gantzen  
welt nicht mehr geschrieben denn also / Er  
sagets/ da war es geschehen/ Er hiesse es/da  
wars gemacht / Darümb sol man kein zweifel  
daran haben/ das das wort Christi/ welchs  
aus nichts all ding gemacht hat / auch das  
brod vnd wein / inn ein ander wesen/ das sie  
nicht waren verwandeln müge.

Diese lange erzehlung der wunderzeichen  
zeigt klerlich an / das der / der dis buch ge-  
macht/ das brod nicht für ein schlechts zeichen

§ des



des liebs Christi helt/sondern fur den waren  
leib Christi/das die natur des brods warhafft  
iglich geendert werde.

Gratianus zeucht einen spruch an/  
aus S. Augustin/welcher sich gar nichts  
auff das Abendmal des Herrn reumet/vnd  
doch viel ergert/Darumb hab ich ihn hie  
auch erzelen wollen/das nicht jmand dadurch  
verfüret würde/Ich wil aber das gantz Capi  
tel/wie es im Decret stehet/nacheinander  
setzen.

Die erste ketzerey vnter den Jüngern Chris  
sti/hat sich erhoben vber dem harten wort/da  
er sagt/Wer mein fleisch nicht isset/vnd mein  
blut nicht trincket/der wird nicht ins ewig le  
ben komen. Das verstunden sie nicht/vnd  
sagten zu einander/Das ist eine harte red/wer  
mag ihn essen? vnd eben jnn dem wort das sie  
sagen/Es ist eine harte red/scheiden sie sich  
von ihm/vnd lassen ihn allein mit sein zwelff  
Jüngern/Das aber die zwelff nicht auch hin  
nach siehnen/rüstet er sie widder das ergernis  
vnd sagte. Der geist der ist/s/der da lebendig  
macht/das fleisch ist nichts nütz/die wort die  
ich mit euch gered hab sind geist vnd leben. Ver  
stehet ihr sie geistlich/so sind sie geist vnd le  
ben/verstehet ihr sie nicht geistlich/so sind sie  
gleichwol geist vnd leben/aber euch sind sie es  
nicht/die ihrs nicht geistlich verstehet/Diesen  
leib/den ihr vor euch sehet/werdet ihr nicht  
essen noch das blut trincken/das die vergiessen  
werden.



werden / die mich crentzigen / Es ist ein Sacra-  
ment das ich euch gebe / welchs das leben  
gibt / so man es geistlich verstehet / Das fleisch  
aber ist nichts nütz / wie sie aber das verstanden  
haben / so antworten sie auch / Denn sie ver-  
stünden fleisch nicht anders / denn wie mans  
inn der scherren verkaufft / odder wie man ein  
tod viehe zusfleisch / Das wuste Ihesus / vnd  
sprach / Ergert euch das das ich sage / Ich gebe  
euch mein fleisch zu essen vnd mein blut zu trin-  
cken / wie denn / wenn ihr des menschen son  
werd sehen hinauff faren / da er vor gewesen  
ist / Mit diesen worten antwort er ihn darauff  
daran sie sich stießen / Das man fein sibet /  
woran sie sich geergert haben / vnd da heben  
sie an die wort recht zunerstehen / sie meinten  
er würde sein fleisch stückweis aus teilen / Er  
aber sagt / er werde so gantz hinauff inn himel  
faren / Wenn ihr werd sehen (spricht er) des  
menschen son hinauff faren / da er vor war /  
da werd ihr denn sehen das ich mein leib nicht  
so stückweis vnter euch anstellen werd / wie  
ihr itzt meindt / da werdet ihr denn sehen / das  
meine gnad sich nicht mit den zenen zu beissen  
lesset / Item / Der Herr ist droben / bis zur welt  
end / Aber gleichwol ist auch hie bey vns seine  
warheit / Denn sein leib damit er aufferstand  
ist / der mus an ein ort sein / Aber seine warheit  
ist ausgebreitet inn alle ort.

Bishier haben wir von wort zu wort /  
das gantz Capitel erzelet / wie es Gratianus  
§ ij setzet.



setzet. Es ist aber aus vielen örten zusammen ge-  
flickt/welcher sich etliche gar nicht zum Abend-  
mal des Herrn reuomen/ Nu weis ja das ider-  
man wol/das die wort darnach gelten/dar-  
nach sie stehē/gesetzt vñ gered sind/an ein ort  
anderst denn am andern/vnd ist viel ein ander  
ding/ob man ongefehr/nach dem es sich be-  
gibt/ein ding kurtz melde odder noch der len-  
ge furneme/gründlichen vnd eigentlichen be-  
richt zu thun/Darumb müssen wir auch hie  
sondere achtung darauff geben/wie vnd aus  
was meinung Augustinus solche spräch hin  
vnd widder gesetzt hab/So kan man denn fein  
klar sehen/das solche gemeine sprüche/gar  
nichts widder den waren verstand vom Sacra-  
ment fechten/Vnd zwar man mag deren  
vnvleis billich straffen/die soniel hundert jar  
daher inn der kirchen geleret/vnd so mancher-  
ley disputation vnd meinung vom Sacra-  
ment eingefurt haben/das sie nie ein mal das  
ran gedacht/das sie solche spruch/welche den  
einfeltigen leuten ergerlich sind/entweder er-  
kleret odder verlegt hetten/Mich sibets dafür  
an/das Gratianus solch geflickte spruch fur  
sich allein zusammen gerafft habe/welche dar-  
nach vnter die leute komen/vnd angenommen  
sind/weil doch die Ppste vnd Bischoff nie  
darnach gedacht haben/das man ein gemeine  
summen der artikel des glaubens/vnd anderer  
Christlicher lere auff einem hauffen het-  
te/denn man fande sonst nirgend die Disto-  
rien der:



rien der Concillien vnd ihr decreta/ so hin vnd  
widder gewesen/ vnd anderer kirchen ordina  
tion beyeinander so kurtz verzeichnet / So  
doch jederman gern gewust hette/ was inn der  
alten kirchen soniel jar her gehandelt vnd be  
schlossen were/ Man sihet aber gleichwol/ das  
der gute man Gratianus / viel vngereimpter  
spruch durch vnd durch anzeucht/ weil er alles  
was er bey ein jeden gefunden hat/ zusamen  
hat raffen wollen/ vnd sonderlich ist dis Ca  
pitel aus vielen vneinigen/ vnd vngleichen or  
ten/ zusamen bracht.

Im anfang sind etliche zeilen aus der  
auslegung des. liiij. Psalmen genomen da diese  
wort stehen/ Die erst ketzerey vnter den Jün  
gern Christi / erhub sich vber dem harten  
wort/ das er sagt/ Wer mein fleisch nicht isset/  
vnd mein blut nicht trincket/ der wird das le  
ben inn ihm nicht haben/ Das verstunden sie  
nicht vnd sagten zueinander/ Das ist ein har  
te rede/ wer mag es hören? Eben in dem wort/  
das sie sagen/ Dis ist ein harte rede/ scheiden sie  
sich von ihm vnd lassen ihn allein / mit sein  
zwelff Jüngern. So fern hat er aus dem. liiij.  
Psalmen genomen.

Das ander stück bis auff den letzten  
spruch/ siehet eins teils/ inn der auslegung des  
xcviij. Psalmen/ eins teils inn der auslegung  
des vj. Capitels Johannis/ da Augustinus viel  
leret von dem brauch vnd nutz des Sacra  
ments / vnd von der geistlichen nressung /  
F iij.      welchs



welchs wir alles gern zulassen / Denn es bleibe  
nichts beste weniger / die eusserliche vnd leib-  
liche niessung auch / denn man mus wiss-  
sen / nicht allein den brauch vnd nutz des  
Sacraments / sondern auch wissen vñ halten /  
die eusserliche einsetzung Christi / eben wie man  
das wort auch behalten mus / Denn Paulus  
sagt / das Euangelium sey ein krafft Gottes  
dadurch selig werden / alle die dran glauben /  
das ist / man entpfahē durch das Euangelion  
durch das eusserlich wort vnd die Sacrament /  
beide glauben vnd geist / Denn die Sacrament  
sind nicht allein dazu eingesetzt / das sie sollen  
eusserliche malzeichen sein / dabey man ein  
Christen für einem Heiden erkennen müge /  
wie man einen Spanier odder Walhen an der  
Kleidung für einem Deudsche erkennet / sondern  
dazu sind sie eingesetzt / das Gott dadurch  
vnsēr hertzen trösten vnd stercken / vnd vnsēr  
glauben fester vnd gewisser machen wil /  
Denn Gott ist selbs dabey / vnd hebt vnd wegt  
die hertzen durch das eusserliche wort vnd zeis-  
chen / welch wir mit den ohren hörn / vnd mit  
den augen sehen / Derhalben wo man von der  
geistlichen niessung saget / hebt man damit  
nicht auff / die leibliche niessung / So ist auch  
das kein gnugsame ursach / das man Christus  
ordnung vnd einsetzung darumb wolt abthun /  
das sie one den heiligen geist nichts hilfft / son-  
dern da sol man vleissig hin sehen / das der heis-  
lige geist sich vns nicht geben wil / on mit vnd  
durch



durch das eufferliche wort vnd zeichen / damit  
er allein vnser hertzen sterckt vnd tröstet.

Das letzte stück ist am aller ergerlichsten /  
vnd dennoch wenn man auff den gantzen  
Text / da es vrsprünglich her genommen ist / se-  
hen wil / wird man finden / das es gar nicht  
vom Sacrament geredet ist / Es ist aber gezo-  
gen / aus der auslegung des vij. Cap. Sanct  
Johannis vñ stehet bald im anfang der dreiß-  
sigsten lection / Das man aber gewis sehen  
müge / das Augustinus am selben ort des Sa-  
craments gar nicht gedencke / wil ich den Text  
gantz setzen / Denn also schreibt Augustinus  
am selben ort.

Lieben brüder / auff die lection da ich ge-  
stern von gepredigt hab / folget der heutige  
Text / den man jtz gelesen hat / Es höreten  
beide die Jünger vnd die Jüden / das Christus  
die warheit redet / Es höreten beide die freund  
vnd die feinde das Christus freundlich redet /  
Es höreten beide gute vnd böse / das Christus  
eitel guts redet / ihene höretens zu gleich / aber  
er macht ein vnterschied drunder / denn er sahe  
vnd wuste zuuor / welche sich aus seinem  
wort ergern / vnd bessern wurden / inn denen  
die dazumal bey ihm waren sahe er es / inn vns  
die wir noch dazu komen solten / wuste ers zu-  
uor / Derhalben so laß vns dis Euangelion al-  
so hören / eben als höret ihr Christum gegen-  
wertig jtzund reden / vnd saget ja bey leib  
nicht.



nicht / O wie selig waren ihene / die ihn haben  
gegenwertig gesehen / Denn viel der selben / die  
ihn gesehen haben / sind verdammet / vnd viel  
sind vnter vns die wir ihn nicht gesehen ha-  
ben / vnd dennoch glauben / Denn die tewren  
wort die er gered hat / sind vmb vnsern willen  
geschriben vnd auff vns behalten / werden  
auch vmb vnsern willen jzt gelesen / vñ werden  
urtan weiter / vmb vnserer nachkomen willen  
auch gelesen werden / Der Herr ist droben bis  
die welt vergehet / aber seine warheit ist hien-  
den bey vns / Denn der leib damit er auffe-  
standen ist / mus an ein ort sein / aber seine war-  
heit ist allenthalben ausgebreitet / Darumb  
höret den Herrn / von welchs worten wir jzt  
soniel er geben wird / reden wollen etc.

Es stehet schier inn allen gedruckten  
büchern ( die warheit des Herrn ist hie / denn  
des Herrn leib damit er auffestanden ist /  
mag an ein ort sein ) Aber wer ein wenig ein  
verstand hat der sibet das es falsch ist / vnd  
zwar Gratianus hats wol verdienet / das man  
ihn lobe vmb seines vleis willen / das er sich  
der mühe nicht hat lassen verdriessen / vnd so  
viel bücher durchlesen / vnd die sprüche / aus  
mancherley örten / so zusammen gebracht / Aber  
weil es hie dem gewissen gilt / in solchen gros-  
sen wichtigen artikeln / ist es nicht zuradten /  
das man auff solche zusammen gerastte geistliche  
sprüch etwas bawen sol / Denn es kan wol ge-  
radten /



raten/das einerley wort nicht einerley verstan-  
den werden/nach dem sie nicht zu einerley zeit  
vnd ort gered werden/Es darff auch nicht viel  
Exempel das zubeweisen/weil man es hie inn  
dem einigen spruch Augustini klerlich sibet/wie  
gar ein andern verstand vnd meinung er hat/  
an dem ort/da er vrsprunglich gesetzt ist/vnd  
im Decret da er stückweis wird angezogen.

Die sibet man klar / das S. Augustin  
gar nicht redet vom Abendmal des Derrn /  
sondern dauon / das er wil / man solle Gott hö-  
ren / welcher mit vns im Euangelio redet / vnd  
fortan nicht mehr personlich die leute leret /  
wie er thete / da er noch auff erden vmbgieng /  
Darumb mus man S. Augustin so verstehen /  
das er rede / von dem leiblichen sichtiglichen  
wandel eines predigers / Der selb leiblich vnd  
sichtiglich wandel / vnter den leuten ( sagt er )  
gehöre Christo nicht mehr zu / sondern sein  
wandel sey fortan ewig / an eim ort / nemlich /  
im himel.

Da sibestu ja / das er mit keinem wort  
des Abendmals gedencket / vnd leugnet allein  
das / das der leipliche sichtigliche wandel ( wie  
eins predigers wandel ist ) Christo nicht mehr  
allenthalben gebäre / Wenn man nu das auff  
das Sacrament wolte ziehen / würd es sich gar  
nicht schicken noch reimen / So aber jemand  
wer / der sich diesen spruch dahin wolt bereden  
lassen / das Christus leib nicht warhafftig im  
G Sacrament



Sacrament sey / der bauet meins bedünckens  
auff einen grund / der zu einer solchen wichti-  
gen sachen viel zu schwach vnd gering ist / Ich  
wolts für mich inn keinen weg nicht wagen /  
das ich auff ein solchen schlechten gedan-  
cken / ein newe lere / vnter die lente bringen  
wolt / sonderlich weil dieser gantzer Text / von  
einem solchen wandel redet / der für vnd für  
bleiben sol / Wenn man nu ein wörlin odder  
zwey heraus wil zwacken / vnd die selben auff  
ein andere weis der gegenwertigkeit Christi zie-  
hen / wie kan man gewis sein / das man Sanct  
Augustinus meinung recht treffe / so er doch  
von einer andern gegenwertigkeit redet? Es ist  
ein gemeine Regel / man sol die wort so verste-  
hen / darnach sie gesetzt sind / Wenn man das  
selbe hie / wie man sol / auch thun wil / wird  
man klar sehen / das die Sacramentschender /  
so war leib vnd blut im Sacrament leugnen /  
gar keinen behelff / ihren irthumb zubestetti-  
gen / heraus nemen können.

Ich weis sehr wol / das hin vnd widder  
inn den alten Lerern viel spräche sind / daraus  
die arge gedanken schöpffen mägen / so inn  
der Christlichen lere nicht wol gegründet sind  
vnd gerne nach newen dingen gröbeln / Denn  
die Lerer reden an ein ort zuweilen anderst von  
einer sache / denn am andern / wenn sie on als  
gefer / inn einer andern handlung auff ein  
ding komen / Aber diese sache / das Sacrament  
belangend / sol inn keinen weg / auff einen so  
bau feligen



banfelligen vnd vngereumpten wahn gegründet sein / sondern klare vnd helle sprüch sol man anziehen / aus welchen man gewis schliessen kan / was die alte rechte kirchen / von solchen artikeln gehalten habe. Denn so man schlecht auff wahn vnd zufallende gedanken inn den artikeln des glaubens bawen wil / wird keiner so gewis gegründet sein / den man nicht müge schwächen vnd umbstossen. Dis alles hab ich aber darumb itzt wollen so anzeigen / das man gewis sehe / wie Augustinus an dem gemelten ort / etwas anders sage / denn die / so ihn auff das Abendmal ziehen / daraus schliessen wollen / Weil aber (wie gesagt) Augustinus hie gar nicht vom Abendmal redet / hat niemand vrsach sich an diesem spruch zu ergern.

Ich habe hie meine meinung niemand zu lieb noch zu leide sagen wollen vnd antworten auff den spruch Augustini / danon ich doch offtmals gefraget bin / versihe mich auch / es sol mirs niemands verargen / das ich sage / man sol inn so grossen vnd wichtigen sachen nicht so bald auff die gemeine sprüche fallen / sondern genaw drauff sehen / wie / vnd in welcher meinung sie gesetzt sind / Gehet es doch für gericht also zu / das man das vrtail nicht ehe fellen sol / man habe denn die recht zuuor gantz / vnd nicht stückweis allein erzelet / wie viel mehr wil es sich hie gebären / das man die sprüch von den Christlichen artikeln nicht stückweis / sondern gantz erzele vnd ansehe.

G ij      Weiter



Weiter / das kan man aus diesem spruch  
auch nicht beweren / das Augustinus den leib  
Christi also an ein einiges ort anbinde / das er  
sonst nirgend sein müge / Denn man hat kein  
gewis zeugnis der schrift / aus dem man er-  
weisen müge / das Christus also an einem ort  
sey / das er nicht zugleich auch an ein andern  
ort sein müge / Vñ alles was man auff bringen  
mag / das Christus leib an ein einigen ort sey /  
das sind nur Argument aus der vernunfft ge-  
nommen / Wenn aber das solt gnug sein / die ar-  
tikel des glaubens aus der vernunfft örtern  
vnd richten / würde sich nie kein zancck von der  
gegewertigkeit des leibs Christi im Sacra-  
ment erhoben haben / Denn es sihet ja jeder-  
man wol / wie gar es widder alle vernunfft ist /  
solchs zuglauben / Aber also schliessen sie gleich-  
wol alle / man müsse inn den artikeln des glau-  
bens / nicht der vernunfft / sondern der klaren  
hellen schrift folgen / Gott gebe es reime sich  
mit der vernunfft wie es wolle / So sagt auch  
Augustinus vber das vj. Cap. S. Johannis  
von Christo / das des menschen son / wiewol  
er auff erden vmbgieng / dennoch zu gleich inn  
der einigkeit der Göttlichen person / im himel  
gewesen sey / den dis sind seine wort / Der einige  
Christus ist das wort / seel vñ fleisch / Der eini-  
ge Christus ist Gottes son vnd des menschen  
son / Der einige Christus ist ewiger Gottes son /  
vnd zeitlicher menschen son / vnd der einige  
Christus war dennoch nach der einigkeit  
der



der Göttlichen person dazumal im himel / da  
er auff erden prediget / vnd des menschen son  
war also im himel / wie der son Gottes auff er  
den war / Gottes son war auff erden inn dem  
fleisch / darein er sich gesteckt hette / Des men  
schen son aber war im himel inn der einigkeit  
der Göttlichen person.

Darumb wil ich den leser trewlich gewar  
net haben / Zum ersten / das er das ja wol fass  
se / vnd merck / das man aus diesem spruch  
S. Augustin / gar nichts vom Sacrament  
schliessen könne / weil er gar nichts vom Sa  
crament am selben ort redet / vnd man mutze  
den spruch auff wie man wölle / so sol er den  
noch nicht mehr gelten / denn die andern klar  
ren vnd hellen spruch / so wir droben aus S.  
Dilario vnd Cirillo angezogen haben / inn  
welchen sie frey bekennen vnd beweisen / das  
der leib vnd das blut Christi warhafftig im  
Abendmal sind / So sibe ich auch noch keinen  
bestendigen grund auff deren seiden / die das  
Sacrament anfechten / warumb vnser mei  
nung / die souiel zeugnis von der alten kirchen  
vnd Lerern hat / vnrecht sey / Es mag wol sein /  
das der andern meinung / den vnnersuchten  
vnd sichern hertzen bas gefalle / darumb das  
sie sich fein mit der vernunfft reimet / vnd mit  
subtilen scharffen argumenten auffgemutzt ist /  
Aber es wird eigentlich den stich nicht halten /  
wenn die anfechtung vnd das gewissen komen  
wird / vnd sie fragen / was fur grund sie ha  
ben /



ben/ das sie von der rechten meinung/ welche  
jimmerzu/ von der Apostel zeit/ inn der kirchen  
gewest ist/ auff ein newe vngegründte irrige  
opinion gefallen sind/ Da werden denn aus  
diesen wörten(Das ist mein leib/ Das ist mein  
blut) eitel donnerschleg werden/ welche das  
hertz so zu engsten vnd zu schlagen werden/  
das ihn die welt zu enge drob sol werden/ Denn  
was wil ein verzagtes blödes hertz/ widder die-  
se donnerschlege auff bringen/ welche sprüche  
welch wort Gottes/ wird sie da gewis machen  
können/ das das wörtlin/ est/ soniel sey als  
significat/ Corpus / als viel als figura corporis?  
Warlich die leichtfürigen vnnersuchten leut/  
die so leichtlich newe secten vnd opinion inn die  
leute bringen/ wissen gar nichts von solchem  
Kampff vnd arbeit des gewissens/ sondern las-  
sen ihn ihre gedanken vnd scharffe köpff bas  
gefallen/denn die helle dürre schrift/ Ich hab  
es versucht vnd weis es/ wie gar keinen stich  
inn der not vnd anfechtung/ solche lere halten  
mögen/so widder das wort Gottes furgeno-  
men werden/sie scheinen gleich wie sie wöllen/  
sonderlich aber diese gegenwertig zwispalt vom  
Sacrament/ ist darumb deste erger vnd gros-  
ser/ das es sich so ansihet/ sie werde mit sich  
bringen/ eine grosse enderung inn der gan-  
tzen kirchen/ Wer wil sich nu on helle kla-  
re zeugnis der schrift/ mit einem solchen vn-  
treglichen gewissen beladen.

Darumb wil ich mich dem wort Gottes  
vnd



vnd der alten kirchen nach halten / vnd bey des  
nen bleiben / so bekennē / das im Nachtmal sey  
der ware leib des Herrn Christi / welche mei-  
nung wir mit klarer schrift erweisen vnd er-  
halten können / Denn ich sehe kein gnugsame  
ursach / dasdurch das wort (leib) allein ein  
zeichen des leibs / der nicht gegenwertig ist /  
verstanden sol werden.

Denn ob wol die gantze schrift vol figur-  
ren ist vnd frembder weis zureden / ist dennoch  
ein grosse vnterschied vnter den Historien /  
wenn man erzelet / wie ein ding ergangen sey /  
vnd vnter den Göttlichen satzungen / da man  
leret von der Göttlichen natur vnd willen / Inn  
den Historien erzelet man / was vnter vnd mit  
den leuten gehandelt sey / da gibt es sich selbs  
das man zu zeiten ein wort anders mus nemen  
denn es heisset / das man vermeide den fremb-  
den vngereimpten verstand / der sonst drans  
folget / Wenn man das auch thun wolte inn  
den artikeln des glaubens / da man von Got-  
tes natur vnd willen leret / kan jederman wol  
ermessen / das man kein artikel rein vnd lauter  
behalten würde / Wenn aber etwas sich nicht  
reimen wil / mit den andern hellen durren sprü-  
chen / odder mit den artikeln des glaubens / da  
mus man den worten mit ein andern verstand  
helffen / Vnd das mercke wol / das man das  
allein thun sol / wo es sich sonst stößet mit an-  
dern klaren sprüchen / oder mit den artikeln des  
glaubens / Wo es sich aber allein stößet mit der  
vernunft /



vernunft / das es sich mit der vernunft nicht  
reimet / so es sich doch mit der schrift vnd an-  
dern artikeln des glaubens reimet / da sol man  
der schrift mehr denn der vernunft folgen /  
Denn es müssen ja die sprüche hell vnd klar  
sein / daraus wir vnsern glauben vnd artikel ne-  
men / Denn wenn man mit den artikeln des  
glaubens vmbgehen möcht / noch eines jeden  
wahn vñ meinung / wurden wir gar kein behal-  
ten / wie wir sehen / das ihr etliche schon ge-  
than / welche mit der weise aus dem Christli-  
chen glauben nichts anders gemacht haben /  
denn ein lautere Philosophi / Denn sie hiel-  
ten es dafür / das die Christen / als gute al-  
bere leute / die figurinn der Schrift nicht  
recht verstanden / vnd darumb viel nerrische /  
vngereimte artikel on ursach für war hielten  
vnd glaubeten / wie ich denn wol inn vielen  
stücken anzeigen wolt / aber ich wil der schwä-  
chen verschonen / Denn man kan die einfelti-  
gen gewissen sehr bald inn den sachen (wo man  
von der schrift kömpt) ire machen / So se-  
hen wir auch zu vnsern zeiten / wie der tollen  
köpff viel sind / die mit solchen subtilen vnd  
behenden glöslin sich versuchen / etliche artikel  
zu felsen.

Vnser Herr Gott gebote dem Abraham /  
das er sich solt beschneiden lassen / das wird  
die Weiden aus der massen lecherlich gedaucht  
haben / vnd dennoch hat er die wort / wie nerr-  
isch vnd lecherlich sie lauten / inn ihrem ein-  
faltigen



faltigen schlechten verstand mus bleiben laß  
fen/ vnd nichts anders draus machen / Da  
hett ein klügling auch mügen kunst surgeben/  
Es sey nicht möglich das Gott so nerrisch  
ding von den leuten fordere / es mus einen an  
dern verstand haben/nemlich das man fleisch  
liche lust dempfen sol/das sey das rechte be  
schneiden/das Gott haben wolle etc.

Dis Exempel hab ich darumb hie wol  
ten anzeigen/so man doch sonst wol andere /  
die klarer weren / finden könd / das ich nicht  
gern jmands gewissen wolt irre machen / Ober  
das / kan man keinen spruch aus der schrift  
auffbringen/daraus man beweren könd/das  
der leib Christi nicht im Abendmal wer /odder  
das man die wort des Abendmals / anders  
deuten sol denn sie lauten / So hat sie die alte  
kirch auch so gehalten vnd gebraucht/on alle  
frembde deutung wie sie lauten/das es sich al  
so nirgends stößet/denn allein an der vernunfft  
die kan es nicht zusamen reimen / Das ist aber  
kein gnugsame ursach / das man darumb von  
den hellen klaren Worten weichen solt / Denn  
so es des gelten solt/das dieser vnd andere arti  
kel/darumb solten falsch sein/das sie sich mit  
der vernunfft nicht reimen / würden wir gar  
keine zusucht vnd auffenthalt inn nöthen vnd  
anfechtungen haben / Denn die schrift heist  
vns inn nöten hülff von Gott bitten / hoffen  
vnd



vnd harren / Da hat mein ich ja / die vernunfft  
vrsach gnug / das sie es nicht für war helt / denn  
man sihet inn der not nicht / das Gott bey vns  
vnd vns gnedig sey / vnd wo er gleich verheißt  
set / das er helffen wolle / schliessen die verzagt  
ten gewissen / Andern leuten wolle er wol helf  
ffen / vns aber wolle er nicht helffen / darumb  
das wirs dafür halten / er zürne mit vns umb  
vnsere sünden willen / Also gar kan sich die ver  
nunfft / mit dem wort vnd verheißung Got  
tes nicht vereinigen.

Also sihet man auch wie schwer es ein  
gehet / das mans dafür halte / Gott neme sich  
vns an / vnd lasse sich vnsere hertzleid jamern /  
das ist aber am aller vnglenblichsten / das wir  
zu gnaden komen sollen frey lauter umbsonst /  
on all vnsere verdienst / allein umb Christus wil  
len / Das Gott umb Christus willen vns erhö  
ren / behüten vnd helffen wolle / wenn man  
hie auch nicht ehe glauben wil / denn die ver  
nunfft ja dazu sage / vnd sich mehr nach vnsere  
gedancken / denn nach der schrift richten wil /  
werden wir gar keinen trost inn der anfecht  
ung haben / Denn es reimet sich eben als we  
nig mit der vernunfft / wenn die anfechtung  
fürhanden ist / das man glaube es sey war /  
was vns die schrift saget / von dem gnedigen  
willen Gottes / als sich reimet / das das brod  
vnd wein / der leib vnd das blut Christi sey /  
Es wils nicht thun mit den Geometricis vnd  
phiscis



phificis speculationibus/die machen die vnuer  
suchten sichern leute gar toll/wenn sie inn die  
heiligen schrift geraten/vnd alles mit der ver  
nunfft fassen wollen/Sondern also sol man  
thun/das man allein auff die schrift sehe/  
vnd sich drauff gründe/vnd wenn man inn  
der schrift kein gewisse helle zeugnis findet/  
das entwedder im brod der ware leib Christi  
nicht sey/odder die wort anderst/denn sie an  
ihn selbs heissen zuuerstehen sein/das man  
darnach stracks schliesse/das sonst kein argu  
ment es scheine vnd gleisse wie es wolle/gnug  
same sey/ein newe opinion vnd lere widder die  
klaren wort zuleren/Sonderlich weil so grosse  
ergernis daraus entstehet/welche keinen men  
schen zuertragen möglich sind/on gewisse vñ  
helle zeugnisse der schrift.

Neben diesem allem/sind sonst viel spräch  
von Christo inn der schrift/die mich dahin  
dringen/das ich festiglich glenbe/Christus  
leib sey warhafftig im Abendmal/Kan auch  
kein ursach finden/warumb Christus da  
nicht gegenwertig sein müge/da er doch war  
hafftig etwas wircket/Denn das ist ja gewis/  
das die Sacrament dazu eingesetzt sind/das  
Gott die hertzen dadurch erregen vnd bewegen  
wil zum festen glauben/vnd nicht darumb  
allein das sie ein ensserlich malzeichen sein sollē/  
da bey man die Christen für den Weiden er  
D ij Kenne



kenne/wie man bey der Kleidung einen Wah-  
len für ein Deudschen/einen Mönch für ein  
Leien erkennet. So ist auch gros daran  
gelegen/das man inn dieser sacht/den waren  
nutz vnd brauch des Sacraments recht vnd  
gründlich verstehe/ Wer auch viel besser/das  
man die gewissen damit vnterrichtet/ wazu  
solch Sacrament eingesetzt sey/denn das man  
mit den Geometricis speculationibus vmbge-  
het/ob ein leib on einen raum/ vnd mehr denn  
an einem ort sein müge etc/Welche disputatio-  
nes zu nichts anders dienen/denn das man  
ihre roher vnd wilder dauon werde/vnd zu letzt  
gar nichts glembe/wie wir leider schon an vie-  
len sehen/das man daraus glemben vnd Gott-  
fürchten lerne/da wird nicht aus. Aber ich  
wil hiemit beschliessen/das ichs nicht zu lang  
mache/denn ich mir nicht fürgenomen ha-  
be/das ich nach der lenge von dem gantzen  
handel disputirn wolle/ sondern habe solches  
also müssen erzelen/das man den spruch S.  
Augustin/darauff die Schwermier hoch trotzē  
vnd bochen/recht verstehe/vnd klar sehe/das  
er gar nichts zu der disputatio vom Sacrament  
dient/ wie sie ihn/neben viel andern vn-  
gereimpten sprüchen/gar vnricht-  
lich anziehē/ihren vngegründ-  
ten irthumb vnd falschen  
wahn zubekreff-  
tigen.



Gedruckt in Witten  
berg durch Geor-  
gen Rhaw.





89

Handwritten text in a Gothic script, appearing as bleed-through from the reverse side of the page. The text is mostly illegible due to fading and bleed-through.

